

Batagaa kaj Pol n'a sanba Tit se

Citaaboo fahamandiroo

Tit goo Pol hangasiney ra. A na Pol faaba Alhabar Boryaa waazuroo ra, a n'a faaba mo a ma Egilizyañ gorandi. Tit hanse ka Pol faaba Pol nda Korent borey ma hin ka faham cere se (Korent borey bataga 2to 7.6–16). Waatoo kaj Tit goo Kret gungoo ra no Pol na batagaa woo sanba a se. A n'a dañ a ma Egilizey kaj goo gungoo din ra faaba ngi diraa takaa ra.

Nda n'a batagaa woo caw, n'ga dii kaj man'ti Tit wala Tit goyoo hinne se Pol hantum a se. Sanda Timote bataga hinkaa takaa, Pol ga šelaj takaa kaj nda Egilizey ga hima ka goy nda ngi jinehuney takaa.

Boraa kaj se batagaa sanbandi maapoo nda fooyanoo kaj teendi a se

1 ¹Agay Pol kaj ti Irkoy tam nda Isa Almasihu diyaw, ay sanbandi hala Irkoy boro suubantey ma naanay, i ma cimoo bay kaj ga koy Irkoy ganayanoo bande. ²I ma duu hunayan abadantaa naataa^a kaj Irkoy kaj si taari na nga allahidoo zaa za alwaatey kul jine. ³Alwaatoo kaj kayandi ra, a na nga meešennoo cebe waazoo ra kaj a n'a talfi ay ga ka sawa nda Irkoy ir Hallasikaa yaamaroo.

⁴Tit, ay ga batagaa woo sanba ma ne, ni kaj ti ay ize cimoo naanaa ra kaj ra ir ga marga. Baaba Irkoy nda Almasihu Isa ir Hallasikaa anneemaa nda alaafiyaa ma kaa ni ga.

Goyoo kaj talfandi Tit ga gungoo se kaj maapoo ti Kret

⁵ Ya nka ni naj Kret gungoo ra hala hayey kaj mana hanse, m'i hanse. Koyra foo kul ra ma Egilizoo boro beeriyañ gorandi nda takaa kaj nda ay na ni yaamar. ⁶Affoo kul ma tee boro kaj ga laybu sii, woy folloku kurje, izey ma tee ganakawayan^b, woy nda aru izefututaray wala tureyan masi harandi i ga, ⁷zama Egiliz jinehun ma tee boro kaj ga laybu sii, a man'ti kala Irkoy jinay talfikaw, a masi tee jindegaabante, a masi tee boro binekonna, a masi tee boro kaj na nga boj noo harifutu hanjan se, a masi tee boro futa, a masi nooru ceecei nda taka žibba. ⁸A ga hima ka tee yawzumandikaw, a ma baa ihenna, a ma tee lakkalkoyni, boro šerrante, boro henanante, a ma hin nga boj. ⁹A ma gaabu šenni laadirantaa ga nda takaa kaj nda a cawandi hala a ma hin ka borey hoyray nda cawandiyen cimoo ka kakawkey gagay.

¹⁰Turante booboo goo no kaj ga šenni har kaj sii nda nafaw, i ga darga, iboobaa man'ti kala Alyahuudey kaj tuubi. ¹¹Miney ga hima ka daabandi, hugu timmanteyan no i g'i jaami ka haya cawandi kaj si hima nooru bajii maaganda se. ¹²Ngi affoo kaj ti ngi hunday annabi, a nee: «Kret gungoo borey, waati kul taariharkawyaj no, adabba futuyañ, fuyyanteyañ kaj si hongu haya kul kala ḥaayan.» ¹³Seedetaraa woo cimi no, woo se ma hanse k'i dañ fondaan ra hala i ma tabati naanaa ra. ¹⁴I masi hawa Alyahuudey filla yaadawey ga nda adamizey kaj bere ka hun cimoo here, yaamarey ga. ¹⁵Haya kul ga henan borey kaj ga henan se,

^a1.1-2 «Agay Pol kaj ti Irkoy tam nda Isa Almasihu diyaw|Diyaw, diyawtaray, ay sanbandi hala Irkoy boro suubantey ma naanay, i ma cimoo bay kaj ga koy Irkoy ganayanoo bande. 2 I ma duu hunayan abadantaa naataa», Grek šenni ra, almaganaa faa ti «Agay Pol kaj ti Irkoy tam nda Isa Almasihu diyaw|Diyaw, diyawtaray, ka sawa nda Irkoy boro suubantey naanaa, ka sawa nda cimoo bayraa kaj ga koy Irkoy ganayanoo bande, 2 hala ir ma duu hunayan abadantaa naataa».

^b1.6 «ganakawayaj», Grek šenni ra, almaganaa faa ti «laadiranteyañ».

amma borey kaj si henan, i si naanay Irkoy, haya kul si henan i se, ngi lakkaley nda ngi biney ga žiibi.¹⁶ I ga nee ngi ga Irkoy bay, amma ngi teegoyey ra i g'a yankar. Harramanteyaj no, turanteyaj no, i si hin ka teegoy henna kul tee.

Cawayan cimoo

2 ¹ Amma ni Tit, haya har kaj ga sawa nda cawandiyen cimoo. ² Nee aru žeeney se i ma hin ngi bon, i ma tee boroyaj kaj borey g'i beerandi, lakkalkoyniyan. I ma tabati naanaa ra, nda bajii ra, nda mujneyan ra. ³ Takaa din da, woy žeeney ma bara nda attabiya henananteyaj, i masi tee miimandakaw, i masi ngi goyoo tee harifutu haryan de. I ma tee ihenna cawandikaw ⁴ hala i ma woysoogey waanandi i ma baa ngi kurjey nda ngi zanke, ⁵ i ma tee lakkalkoyniyan, i ma mooru žiibi, i ma huga nda ngi hugoo goyey, i ma tee boro boryo, i ma yee ngi kurjey se ganda hala Irkoy meešennoo masi wowandi.

⁶ Takaa din da, arusoogey hoyray i ma duu lakkal, ⁷ ka tee i se boro kaj i m'a guna ka tee haya kul here teegoy henna teeyan ra. Ni cawandiyano ma kaaray, a ma teendi nda taka henna. ⁸ Ni šennoo ma tee cimi kaj si hin ka kakawandi, hala boro kan gaaru a se, koyoo ma haw, a masi hin ka haya laala kul har ir ga.

⁹ Bajnay yaamar i ma yee ganda ngi koyey se haya kul ra, i ma tee boroyaj kaj ga kan ngi koyey se, i mas'i kakaw. ¹⁰ I masi haya kul lanbandi, i ma laadir haya kul here, hala i ma duu ka Irkoy ir Hallasikaa cawayanoo beerandi.

¹¹ Zama Irkoy anneemaa bangay kaj ga hallasiyan noo adamizey kul se. ¹² Anneemaa woo g'ir aladabu ir ma Irkoy hunburay janjaa nda adujna boonay futawey yankar, ka dira zamanoo woo ra nda lakkal, nda šerretaray, nda Irkoy ganayan. ¹³ Takaa din da nda ir ga naataa batu kaj ti gomni, waatoo kaj ir Irkoy beeroor daržaa ga bangay. Nga ti Hallasikaa Isa Almasihu. ¹⁴ Nga kaj na nga bon noo ir maaganda se, k'ir kaa goy futu kul cire, k'ir henanandi ka tee nga bon jama cere-cerantaa kaj ga durkutu goy henna teeyan bande.

¹⁵ Tit, hayey wey har, borey hoyray, i daŋ fondaan ra nda hini timmante. Boro kul masi donda ni.

Takaa kaj nda Irkoy ganakaw ga hima ka dira

3 ¹ Ganakey hongandi i ma yee jineborey nda hinoo borey se ganda, i ma hanjajer i se, i ma soolu teegoy henna dumi kul teeyan se. ² I masi boro kul wow, i masi tee yenjekaari, i ma tee boro boryo, i ma tee bineyayna borey kul here.

³ Zama ir mo, waatoo din ir man'ti kala lakkal jaŋanteyaj, turanteyaj, darganteyaj. Ir na boonay futu nda bine-ibaayi dumi-dumiyaj tee ir goyoo. Ir dira laalay nda canseyan ra. Borey n'ir konnay, ir konna cere.

⁴ Amma Irkoy ir Hallasikaa hennataraa

nda nga bajoo adamizey se bangay.

Waatoo din ra

⁵ a n'ir hallasi, man'ti ir teegoy šerrantey albarkaa ra, amma nga tamallaa ra a n'a tee.

A n'ir hallasi k'ir pumay hala ir ma hayandi taaga ka bere ka taaga Hundi Henanantaa albarkaa ra.

⁶ Hundoo woo, a hanse k'a doori ir boj gumo

Isa Almasihu ir Hallasikaa albarkaa ra.

⁷ A n'a tee hala nga anneemaa kaj n'ir tee boro šerranteyaj ra, ir ma hunayan abadantaa tubu kaj ti ir naataa.

⁸ Šennoo woo, šenni hakiikante no, ay ga baa ma hayey wey gaabandi borey ga hala wey kaj naanay Irkoy, ma bara jine teegoy henna teeyan ra: woo ti haya kaj ga boori a ga adamizey nafa. ⁹ Amma ma ni boj hawgay lakkal jaŋantey kakawey,

nda kaaga bayyaney, nda yenjewey ga, nda ašariyaa alfitinawey ga, zama i sii nda nafaw, yaadayaj no.¹⁰ Boro kaj ga borey fay, a moorandi ni, nda n'n'a gagay cee foo, cee hinka.¹¹ N'ga bay kaj boraan dumoo dere, a ga cindi zunubu teeyan ra ka nga boj zukandi.

Hoyray kokorantey nda fooyanoo

¹² Waati kaj ay na Aremas wala Tišik sanba ni do, gaabandi ma kaa ay do Nikopolis, zama no din no ay kayandi ya jiyaa tee.¹³ Ma huga nda Zenas kaj ti ašariyaa baykaa, nda Apolos hala haya kul mas'i kuma ngi naarumaa ra.¹⁴ Kala ir borey mo ma teegoy henna teeyan denden, hala borey kaj goo ſiitey ra se, ngi faabayanoor ra i ma tee boro jinawey. I masi tee boroya kaj ra nafaw sii.

¹⁵ Borey kul kaj goo ay bande ga ni foo. Borey foo kaj ga baa ir, naanaa fondaar ra. Irkoy anneemaa ma bara war kul bande.